





平閩紀卷之一目錄

奏疏

驚聞 寵命等事疏

欽奉 上諭事疏

閩疆剿撫等事疏

恭謝 天恩疏

軍機亟宜等事疏

恭 報領到等事疏

敬竭愚忠等事疏



水師請設等事疏

剿寇務選等事疏

酌調官兵等事疏

恭報官兵等事疏

飛報出洋等事疏

飛報大勝疏

標員懸缺等事疏

平閩紀卷之一

懋紹漁山

三韓楊 捷元凱著 男懋緒令鴻纂

懋綸今掌

奏疏

驚聞 寵命等事疏

奏為驚聞

寵命自揣老疾力難勝任謹具疏直陳以無誤巖疆事臣  
於康熙十七年五月十六日卯時接蒙兵部劄付為



欽奉

上諭事內開該議政王等會題前事等因康熙十七年五月初八日題初十日奉

旨郎廷相段應舉俱著解任吏兵二部嚴加議處具奏餘依議江南提督楊 謀勇兼優威望素著歷任巖疆兵民感戴効力有年克稱厥職前以江南重地彈壓需人特簡賢能用資料理邇者江南地方寧謐著有成效今閩省海氛未靖正在用兵必得偉畧奇材方克掃蕩鯨鯢底定疆圉楊 著以原銜加少保兼太子太保調補福建全省水陸提督總兵官一切剿禦賊寇保固地方戰守機宜全資殫心籌畫展布壯猷以副朕簡擢倚任至意欽此合劄該提督欽遵施行等因到臣蒙此臣聞命自天措躬無地伏念臣謏劣庸材蒙

世祖章皇帝暨

皇上兩朝知遇殊恩歷任江西廣東福建山東等處彼時臣年正壯血氣方剛督兵所向或剿或撫頗著微勞嗣蒙

皇上特簡調任江南以來適值滇黔八閩相繼告變臣屬



既有震隣之恐復多徵調之煩而海逆聯踪不時飄突冀圖登犯臣既悉簡精銳赴援浙省旋募驍勇練保海疆一切釐剔整頓防禦機宜凡精力之所能爲不敢不竭厯料理幸賴

朝廷洪福保此財賦重地得以晏然無虞獲免隕越但臣年已六十有二向有淋閉之疾兼因邊海潮濕脾氣衰弱寒暑失調近復加以頭目暈眩每一舉發卽爲昏迷必倩醫調治數日方痊久擬自陳乞休顧以時方多事不敢卽安勉圖報稱迺荷

皇上不以臣爲不職晉臣官保之銜畀臣以福建全省水陸提督之任臣何人斯叨沐

異數如此之隆臣雖肝腦塗地未足仰報萬一若臣精力尚可驅馳則畢此裹革之志爲

皇上綏靖南服分所宜然第今日正當軍興之際必得強壯之才以全副精神料理庶克有濟今臣年旣老邁病又時發竊恐濫膺

寵命將來有誤地方臣罪滋深用敢據實自陳仰叩天恩俯憐微臣年力與閩非宜亟賜罷職收回



成命另簡賢能英敏保固閩疆則臣雖伏處猷畝有生之年益戴

高厚之鴻慈矣伏乞

皇上睿鑒勅部議覆施行

康熙十七年五月十七日具奏奉

旨卿長才偉畧久鎮巖疆防禦賊寇安輯兵民勞績茂著今閩省軍務方殷正需籌畫以資料理調補福建全省提督已有成命著益殫壯猷以副朕倚任之意不必以疾求罷兵部知道

欽奉 上諭事疏

題爲欽奉

上諭事康熙十七年五月十八日卯時蒙兵部劄付內開該議政王等會題前事康熙十七年五月十二日侍郎溫代奉

上諭提督楊 標下江寧綠旗兵丁有情願隨去者應准發去著議政王貝勒大臣會議具奏欽此該臣等會議得今江寧提督楊 蒙

皇上簡任總管福建水陸兵丁提督其標下官兵內有情



願隨往福建者相應遵

旨發去應行提督楊 伊標官兵內如有情願隨往福建者一面帶去一面奏

聞將所帶官兵數目造冊仍報兵部俟抵閩之日將此帶去官兵俱歸入該提標額數內可也等因康熙十七年五月十二日題本日奉

旨依議欽此合劄欽遵施行等因又蒙兵部劄付爲請旨事內開江寧提督楊 奉

旨以原銜加少保兼太子太保調補福建全省水陸提督

總兵官查松江府至福建泉州府二千八百餘里今正當滅賊之際相應將提督楊 速令前往提督楊

應以文到十日內起程限四十日內到任其江寧提督事務就近令崇明提督劉兆麒暫行署理等因康熙十七年五月十二日綠頭牌啓奏本日奉

旨依議欽此合劄欽遵施行計發劄付一張等因蒙此案照先蒙兵部劄付前事備劄到臣臣以

皇恩深重感極涕零自念年老多疾精力非舊恐致貽誤地方隨具有驚聞



平陽府志 卷之一  
五  
寵命自揣老疾力難勝任謹具疏直陳以無誤巖疆事一

疏上瀆

天聽冀邀

睿鑒罷職歸里理宜靜候

明旨乃復奉

上諭勅部議覆准臣隨帶官兵前往限日起程是

皇上不以臣爲庸劣端責臣以盡力疆場奠安八閩臣雖  
老邁何敢不勉圖報稱惟有頂戴

高深誓捐頂踵以仰報

隆恩於萬一除遵限束裝外臣伏思閩省歸正之後逆賊

已經敗遁何以蠢爾遊覓尚敢狂逞必係兵力未精

或將領未盡得人以致寇盜不能消弭且臣近聞閩

中各營精健之士或有被脅下海或經陸續逃亡存

者什無二三而行間召募之兵未免濫收充數無濟

實用至土著兵卒不特怯懦不堪更與逆孽暗通聲

氣臨陣不肯血戰用命臣前援剿福建時在雲霄銅

山地方與賊對壘深悉其弊今臣旣矢竭駑鈍爲

皇上宣威戮力剿寇安民若不選帶久練精銳之衆以資



彈壓并得一二歷練親信之員以寄心膂則孤立無助何能警服異志保固疆圉仰紓我

皇上宵旰之憂臣正擬控辭不獲必當特疏陳請茲得蒙上諭令臣隨帶官兵仰見

皇上洞燭行間事機俾臣驅策防剿得以展布幸莫大焉查臣素日蓄養材官健丁以及在松各營陸續召募山東西北之壯士經臣日夕訓練成旅恩信相孚堪資戰守今在閩之兵旣未必可用卽臣到彼沙汰釐剔陸續選練恐閩中久罹兵燹四方精健之士至者絕少招募維艱若仍收補土著之兵則又未知心腹寧敢遽用念福建與江南總屬

朝廷封疆而閩省正在用兵所需能將精兵尤爲喫緊若僅以情願者遵

旨帶往則兵力不敷臣雖志在滅賊奚能相機驅遣克奏膚功臣擬於標下陸營挑選精銳馬步戰守兵丁合臣原帶材健共足貳千名戰馬肆百匹及隨帶盛甲砲械并於臣標遴選才技兼優歷練堪任遊擊壹員張念祖又應回山東中營中軍守備李璉願隨臣赴



閩自効該備膽畧邁衆練達營伍堪以署理遊擊事務并選守備壹員李應龍又查臣先經報部准隨標効用候推守備陳應隆久歷戎行才能禦侮堪以署理守備事務其千把等官悉照營制抽調率兵隨臣入閩在臣旣得久練勁兵左右驅策賴以建威消萌在江南五方聚會之區選募精壯補額比閩中較爲容易臣從封疆起見冒昧瀆陳并一面挑選外伏望皇上俯鑒微臣感恩圖報實心辦賊之愚忠特賜

允臣所請照數隨帶並請亟行江南督撫照例支給行坐糧餉以資長途齎裹并造支安家月米以慰兵心俟臣抵閩之後簡閱彼中官兵力行整搦兵則沙汰老弱分入經制補額官則查缺

題補設或無可清汰頂補則循照援兵之例俟事平仍歸原營庶臣殫心防剿臂指有資所裨於巖疆非渺小矣事干選帶官兵係屬軍機臣謹密疏拜

聞伏乞

皇上睿鑒勅部速賜議覆行臣遵奉施行



康熙十七年五月十九日

閩疆剿撫等事疏

奏爲閩疆剿撫需才能將亟當儲選臣謹具疏  
奏明併隨帶能員以資征剿事臣蒙

皇上隆恩特簡調任福建全省水陸提督總兵官又蒙  
俞旨准臣選帶官兵隨往俾得盡力封疆愈深感奮臣已  
統領兵馬星言就道矣惟是剿除逆賊底定疆圉諸  
凡剿撫事機必資群策群力多一能將可抵勝兵數  
百之用今在閩見任將弁其才能賢否臣尚未及預  
知容臣抵境之後詳加密訪倘重地要汛之將備或



有怯懦不堪或有兵民未協者亟宜題

請更換自應選帶才勇歷練親信可托之員以備任用是  
臣今日効忠於

皇上首當以人才爲亟亟也臣在江南伍年熟悉見任松  
江城守營遊擊劉起龍久歷疆場才勇過人又後營  
中軍守備何濱黃浦營守備李英楊舍營守備張瑞  
徵俱技勇軼群諳練戎務又原任提標中軍遊擊王  
嘉會才猷敏練克嫻軍旅前隨福建總督臣郎廷佐  
在浙領兵剿賊建有功績曾經康親王給有劄付繼  
因江南提標奉部駁追康熙九年馬價奉調回松未  
經補用又臣嫡姪楊懋紱原任河南南汝鎮標鄧新  
營千總歷俸年滿送部候補准以守備推用本官歷  
練戎行才能邁衆以上陸員俱堪寄任千城值今用  
人之際難拘常格臣謹先行

奏明俟有相應員缺容臣遵例坐名保

題補用必能宣力巖疆克著成效再查臣標千總司起  
龍齊亮金山營千總田毓瑞才技優長均堪驅策又  
臣親隨將材閭相崔陞雷鳳高永福張九龍蘇明彥



趙吉祥曾子孟王安國任定國張貴宋官楊得勝王際泰趙元吉劉才王治國毛應登魏才姚金全田虎楊保江光斗彭太李進御朱鳳鄂公祿陳亮李枝華馮魁王龍許廷奉楊奇得吳洞羅光乾等皆隨征日久武勇超羣報部冊內有名又方有功楊撰盧之望李懷劉光明楊淳甲楊淙甲文耀亦係久隨驅策弓馬優嫻以上共肆拾叁員名遇有守備千把員缺俱可量才任使以濟防剿之用臣從儲選才能力圖報稱起見用敢瀆陳伏望

皇上俯鑒庶臣臂指有人得以殫心剿撫可收底定之效於將來矣除劉起龍何濱李英張瑞徵王嘉會司起龍齊亮田毓瑞容臣抵閩後題

請調補外今將嫡姪楊懋紱并將材閭相等隨帶赴閩從征報効臣謹具疏

奏明伏乞

皇上睿鑒施行

康熙十七年六月初九日



天恩事臣以謗劣庸材深沐  
奏為恭謝  
恭謝 天恩疏

世祖章皇帝暨

皇上兩朝知遇殊恩閱歷疆場三十餘年幸免貽譏覆餗  
然夙夜思維實愧捐糜莫報前自東省量移江南念  
此財賦重區外控邊海內枕湖山禦寇保民時懷綆  
短汲深之懼五年以來仰仗

朝廷威福地方獲邀磐石之安庶無罪戾乃



皇上以臣供職著效復

特簡微臣提督全閩既晉宮保崇銜更蒙

天語褒嘉迥逾常格又荷渙頒

上諭准令帶兵赴任俾克展布臣受

恩愈爲深重揣分實所難安顧念臣子致身之義不敢以

衰邁自諉有辜

皇上知遇之隆謹祇遵

寵命赴閩任事臣惟有殫竭心力調度官兵相機剿撫底

定閩疆保安黎庶仰報

朝廷高厚於萬一耳臣謹具疏奏

謝伏乞

皇上睿鑒施行

康熙十七年六月初九日



軍機亟宜等事疏

奏爲軍機亟宜展布靖寇必先安民謹瀝愚忠密

奏仰祈

天語飭行以收蕩平實效事竊照臣本襍線庸材年逾耳  
順荷蒙

皇上鑒臣三十餘年歷事

兩朝一片血誠畀以提督八閩重任臣膺此

異寵誓期捐糜頂踵力圖報稱以仰紓我

皇上南顧之憂因兵難遙度一切戰守機宜容臣親抵閩



疆相度熟籌次第料理舉行外但臣有鯁鯁過慮者  
軍機重務得失在乎呼吸倘少有異同掣肘稽遲未  
免坐失機會今閩省上有親王次有將軍督撫重臣  
諸凡地方機宜臣敢不悉遵調度殫心區畫冀得當  
而後行第八閩情形與江浙險易不同臣既遠在行  
間身任剿撫之責隨宜應變軍機間不容髮將來或  
有一得之愚籌之已熟借箸指陳在親王及將軍督  
撫諸臣洞燭事勢必邀鑒允臣又何憂於牽制然不  
預鳴於

皇上之前設或呼應稍稽未克施展恐負

朝廷責成之至意用敢先事籲陳伏望

皇上鑒臣感激圖報之愚忠特賜

天語申飭凡有行間重務及地方機宜

允臣所請或密疏入

告迅祈勅部准行或啓請親王咨商將軍督撫事務准臣

相機興舉庶臣得竭忠盡瘁漸圖削平逆寇以仰報

天恩於萬一臣卽赴蹈湯火無辭矣抑臣更有

請者閩省自叛變以來百姓之流離困苦莫可勝言全藉



地方有司各官加意培養以復元氣卽投誠之衆尤  
宜安插得所俾其安心樂業異志不萌則內寧而外  
自靖民安而寇可平雖文武不相統轄微臣職司軍  
旅原未敢於越俎然臣旣謬膺全省重寄剿寇本以  
保民若有司撫循無術則民不安生勢必流爲匪類  
是亂將滋蔓剷除難盡其何以剪平逆孽綏靖疆圉  
并祈飭行督撫諸臣如地方各官有玩愒軍務撫輯  
無能者立行特疏糾叅以示懲儆別簡賢良保此殘  
黎則文武同心安民息寇可期實效於將來矣事屬

閩疆今日第一急務臣因受

恩深重志切肅清不得不言亦不敢不言臣謹密疏上  
聞伏乞

皇上睿鑒勅部議覆施行

康熙十七年六月初九日

題

本月二十六日奉

旨議政王貝勒大臣會議具奏



恭報領到等事疏

奏爲恭

報領到新頒

勅印併微臣入境開印受事日期事臣本庸材特蒙  
皇恩簡畀茲任臣遵

旨選帶兵馬從松江啓行間六月初十日未時准瓜洲安  
塘筆帖式馬蘭泰差撥什庫陶繼代齋捧坐名

勅書壹道銀印壹顆併兵部劄付到臣臣恭設香案望  
闕謝



恩祇受訖因未到閩境不敢開用遂於是日土船開行其馬匹從陸路趕往臣念部限嚴切晝夜催趲但船載盛甲砲火因亢旱無雨灘高水淺不能遙往其馬匹從陸路行者又因酷暑險峻馬多疲癯至六月二十九日人馬齊抵衢州雖與閩地接壤柰仙霞高峻入省俱係崇山臣思到閩正欲用兵馬力實所攸賴不得已已在衢休養數日隨於七月十二日到福建建寧府浦城縣業入閩境臣敬設香案宣讀

勅書望

闕叩頭謝

恩開印受事訖所有

王命旗牌尚未齎至其一切地方事務并整頓兵馬調度防剿機宜容臣相度情形悉心籌畫次第入

告舉行外謹將開印受事日期理合奏

聞伏乞

皇上睿鑒施行

康熙十七年七月十二日



敬竭愚忠等事疏

題爲敬竭愚忠揆情審勢謹補牘再陳務得官兵之心  
力以早靖巖疆事切臣昔年援剿福建時頗悉彼中  
情事其人語言難辯易生疑詐且先經從逆與賊聲  
氣相通臨陣之際實難倚任臣自奉

命之日遵卽挑選江寧提標官兵共足貳千名戰馬肆百  
匹隨帶入閩業於欽奉

上諭事疏內

題明幸邀



慈鑒俞允臣感激不勝自謂得此一旅可以倚爲心膂早  
建救寧之功上紓我

皇上南顧之憂詎料束裝啓行之後中途迯歸紛紛不已  
臣思彼皆久受

朝廷豢養之恩又經訓練臨行臣捐俸借貸犒賞不等共  
計肆千餘兩臣力已竭各兵豈不浚知

國法輒敢倡迯臣雖諄諭將弁隊目反復告誡嚴加懲創  
將壹貳人立寘軍法前後迯兵除臣一面沿途召募  
精健補伍外但人懷去志勢難預必臣焦心如焚食

不下咽推求其故隨明訪暗察實因各兵俱有父母  
妻子亦有田庄世業見在松江今聞入閩之日卽歸  
入閩中經制從此回鄉無日拋棄骨肉若欲搬取則  
蕩廢其產心實難捨是以不避斧鑕接踵而迯臣晝  
夜思維再三諮詢若照援剿之例事平仍歸松江原  
伍則人人心安志順咸効死力自不迯往矣臣敢冒  
昧具陳伏祈

聖慈允臣所請除臣原帶材官健丁叁百名容查補閩省  
經制外其餘壹千柒百名比照前年臣標應援浙江



官兵貳千伍百名之例如在行間各給月餉以贍家  
口支領行糧以爲衣鞋口食之資一經事平卽令旋  
歸松江停給行糧此往事可覆按者也如此則兵之  
內外俱安咸知回家有日不生去志然臣更有

請者今日逃回之兵當茲用人之際法難寬貸臣業移明  
江南督撫提按名拿解仍造冊呈送兵部外懇請

勅江南督撫提諸臣行令該地文武挨查各兵如有逃回  
藏匿在家或投主竄入營伍者務期嚴拿立押赴閩  
不但營伍充實而軍律可整矣事關喫緊軍機謹具

疏密陳仰祈

宸鑒迅賜勅部議覆施行

康熙十七年七月十二日



水師請設等事疏

奏爲水師請設專員微臣揣分難兼謹密疏控辭計圖  
萬全事竊照閩地寇虐方張山海交訌是今日水陸  
俱在用兵有萬難兼顧之勢臣自幼從戎身經戰陣  
俱馳驅於車馬之間從未乘風破浪以角勝於水師  
今一旦畀臣以兼管水陸之任惴惴不克自安聞  
命之日卽欲具辭水師因未開印不敢上疏及入境受事  
又以途次匆遽不遑控辭今甫抵省不敢再延恐誤  
國事是以籲



聞臣更攷福建舊制原有專設水師提督後因海面無警  
鄭逆竄伏臺灣故爾奉文裁去今則海寇見駐廈門  
於漳泉等處水陸交犯狂逞之勢什倍於昔自應循  
照舊制特設專員令其統轄沿海兵將調度水戰俾  
臣得以盡力陸路一心剿禦剪其攻城掠野之狡謀  
則從此陸兵水師各有職掌彼此呼應互相聲援將  
見數十年之逋寇可立殲於茲矣今臣正在料理陸  
地攻守之事弗暇兼顧水師若不早爲

奏明倘海上賊艘一時並集雖有沿邊將士無專師以  
統之其志不一難以建功是水師分設之議在今日  
有斷不容稍緩者伏祈

皇上洞鑒邊海情形俯察愚臣誠悃

勅部速議

特簡熟諳水道才能夙著之員另設提督使水師早成勁  
旅其於式遏寇虐有裨軍機非淺鮮也臣不勝惶悚  
待

命之至密奏請

旨



康熙十七年八月初一日

剿寇務選等事疏

題爲剿寇務選勁兵以佐指臂之用仰祈

鑒俞

勅部調發以臻實効事竊惟地方用兵必使人人各懷忠憤報効

朝廷庶爲將者得以驅遣從心不難立臻實效今閩地變亂以來加之海寇狂肆招納亡命接踵爲亂遍地烽烟即使東蕩西除彼消此長若不講求於受病之源亂曷能已臣見以本地之人充兵難以倚任必得北



方勁卒其人樸直膂力强悍若兵將同心不但用命  
殺賊且可建威消萌此乃弭亂之第一義也况臣標  
爲應援通省彈壓八郡之旅原非他營可比則在標  
之兵務選雄健精銳充實營伍一遇征剿便能衝鋒  
破敵隨地制勝方使賊人聞風喪膽臣受

朝廷高天厚地之恩值今海寇橫行攻城屠邑漳泉一帶  
無不被其荼毒臣切齒腐心誓不與之俱生奈前提  
臣段應舉在海澄受圍親帶標兵二千五百八十餘  
名多係外境精健併馬二百八十餘匹一時被陷其

餘又皆援漳守泉及分防泉屬縣汛今臣於本標無  
一兵可調晝夜不寧寢食俱廢當此拯溺救焚之際  
萬不得已暫於閩省上游鄰近江浙地方邵延建三  
府內量募外省精健之人隨數充伍尚恐未經訓練  
不能禦寇因思臣在山東時頗知河南山東各營熟  
習交鳥鎗者甚多倘得各撥壹千名再於江南撥弓  
箭砲手壹千名併馬匹亦照經制撥發此皆久在營  
伍之兵一經調入閩省即可殺賊立功仰祈

皇上垂念八閩殘疆山海交訌蹂躪已極



勅部速議允令河南山東江南三省早爲調撥臣得此一  
旅人皆外省精銳訓以紀律自能得手應心可收指  
臂之用其所食錢糧不煩另措卽將臣標缺額兵丁  
之糧餉兌給調發之兵支領俟地方大定如調發兵  
丁內有願留者聽其填入經制其餘悉發回原營將  
臣標另行補額則各兵自不苦於徵調矣臣爲封疆  
任重值此殘敝已甚若不前後籌度速加整頓則日  
漸頽敝

朝廷疆土何日清寧臣感切圖報實心任事不敢因循仰

祈

睿鑒允臣密請

勅部議覆施行

康熙十七年八月初一日



酌調官兵等事疏

題爲題

報酌調官兵進剿事竊臣自奉

命入閩卽晝夜兼馳前進亟圖剿賊而人馬冒暑遠來半  
多疲病臣焦心焚灼以日爲年於七月二十二日甫  
抵省城奈馬匹尙未全到隨啓康親王請授方畧調  
兵前進因康親王及督臣於臣未到之先見漳泉寇  
衆侵犯日甚抽調各路兵馬救援徵發殆盡至臣標  
官兵除陷失外餘皆分防泉屬出援漳州並無一官



平陽紀 卷之一  
一兵可調不得已於近省之羅源連江及福州城守  
延平等各協營量抽二三百名不等并福寧鎮標兵  
貳千名共足叁千餘名啓請康親王蒙允徵調當卽  
咨行各鎮將照數抽撥除力催各營兵馬到齊并臣  
之馬匹一到臣領原帶松江之兵卽與鎮臣黃大來  
星夜前進一抵興化會同撫臣吳興祚相機調度剿  
殺逆賊俟大兵至日再圖大舉務滅巨寇底定閩疆  
事關調集官兵進剿合具密疏

題明伏候

睿鑒施行爲此具本遵例傳捧謹密題請

旨

康熙十七年八月初一日



恭報官兵等事疏

題為恭報官兵直抵泉州力解重圍仰慰

聖懷事竊臣自抵福建省城之日秣馬厲兵志圖滅賊隨  
面請康親王指授方畧臣一俟江南標營兵馬到齊  
遂於八月初九日臣率原帶官兵并抽調連江羅源  
延平福州城守等營同福寧總兵黃大來等兵馬自  
省城前抵興化正在商議進兵間奉康親王復遣叅  
贊大臣禪布帶滿兵繼至臣同禪布并先在興化副  
都統季爾他布浙江提督石調聲巡撫吳興祚總兵



黃大來等計定臣與禪布季爾他布石調聲黃大來等帶領滿漢官兵從洛陽橋大路直抵賊首劉國軒等老營巡撫吳興祚帶領官兵從仙遊縣前進俱於八月二十一日自興化啓行臣於沿途撥發塘馬探有逆賊在惠安一帶屯劄臣鼓勵官兵奮勇直進賊見我兵勢大其新招烏合之衆首先奔散餘賊悉歸老營臣卽於二十四日午時恢復惠安縣見城垣拆毀民人竄匿臣一面出示招撫復業次早督兵前往又探得劉國軒等聞我兵精銳強盛將圍城大夥賊衆先上海船於拆斷洛陽橋之處留賊數千大小賊船壹百餘隻把守以阻我兵衝突又撥賊叁千有餘把守陳山埧深浚濠溝以扼我兵繞泉要路臣公同密商二十五日午時先令總兵黃大來帶領鎮標遊擊張含高守備蔡遜等率兵前據洛陽橋口臣與提督石調聲率原帶江南提標左營遊擊張念祖守備李應龍右營守備陳應隆連江營守備鄭興浙江提標遊擊曾承等各帶官兵同滿洲大兵繼進開砲攻打隨破賊踞橋上第三層砲城寨柵殺死投水逆賊



不計得獲賊砲十位因橋梁拆斷難以徑渡臣一面採伐木植搭橋一面與賊對敵臣仍計設奇兵由陳山壩前進繞出橋南使賊首尾受敵本日戌時會商遣發臣帶江南提標守備署右營遊擊事李璉福州城守右營守備晉淑玉浙江提標叅將王英溫鎮標遊擊傅成等各帶本標營官兵五百名合成一旅前往陳山壩奪路剿殺二十六日臣搭橋甫完統兵前進用砲打沉賊船貳隻將在船賊人盡行溺死泉州城內副都統雅大里等帶領滿漢官兵本日巳時亦到橋南而臣所遣李璉等見陳山壩賊兵掘濠劄營相拒我兵奮力攻開隨放火燒燬營盤并所獲器械一面追趕敗賊殺死六百餘名此時亦皆齊到橋南兩路夾攻復用砲擊碎賊船賊皆淹死其餘各賊俱披靡敗遯城圍遂解緣一時隔海難追不能盡滅臣於本日申時入泉州府城訖前此賊勢披猖圍城兩月有餘今滿漢官兵同心盡力使鴟張巨寇盡皆瓦解皆仰仗

皇威丕振親王勝筭故能成功迅速其行間將士爭先用



命臣不敢沒其功次應否議叙聽候部議臣仍多方  
撫輯難民招集流亡督率兵士剿靖餘氛以安地方  
此皆臣職分宜然不敢侈言勞績所有泉州解圍情  
形理合

題報伏祈

皇上睿鑒施行爲此具本遵例傳捧謹題請

旨

康熙十七年八月二十九日奉

旨覽卿奏會同滿漢官兵進剿海賊兩路夾攻擊敗賊衆  
用砲打沉賊船斬殺甚多直抵泉州解圍恢復惠安縣  
城得獲砲器等項具見殫心籌畫調度有方勞績茂著  
將士奮勇深爲可嘉在事有功人員著從優議叙具奏  
兵部知道



飛報出洋等事疏

題爲飛報出洋官兵大勝事竊照海逆叵測在陸者攻城踞邑復遣逆黨駕船乘潮窺犯以此遙聯聲勢臣於本年七月二十二日抵省卽日調兵赴泉進剿撫臣有添船募兵之疏臣有兼管水陸之責隨將水陸機宜啓請康親王指示間撫臣吳興祚已於二十四日出師興化惟有驛傳道僉事王國泰撫標下外委同知陳堯道援剿水師總兵林賢黃鎬到臣署面商臣料賊船屯聚定海必俟我陸兵南下爲尾後之策



務須先破定海逆踪爲要道鎮各官咸以爲宜遂訂期出洋臣一面統兵由興化陸路往解臬圍一面密行閩安副將田萬侯整搦船兵一同出洋進剿去後今於九月初九日據田萬侯報爲飛報大勝事內稱竊照職標各營船兵奉調同援剿水師總兵林賢征剿海寇於本年八月二十二日自紅山開駕午時到館頭地方合艖二十五日職差右營把總莊國坐駕哨船前往口外探報二十六日酉時據莊國報稱探得各營戰船本日直抵定海進剿其賊艖先已瞭見我官兵船隻俱駕駛往北各營戰船見泊定海等情至八月三十日據委理水師遊擊王祚昌報稱職於本月二十七日帶領所轄官兵船隻合艖進剿本日追至官塘洋面賊見我師前進率大小船貳百餘隻乘風迎敵卑職與隨征原浙江招撫同知王立昇督率外委隨征水師守備魏文耀閩安右營千總林五瑯等各戰船官兵從中路首尾衝敵得獲大鳥砲船壹隻焚燬賊鳥船四隻犁沉趕繒船壹拾壹隻雙篷船拾貳隻陣斬僞水師前鋒鎮總兵二員林德林



聖副將二員陳潘謝益併殺死賊衆及落水淹死者  
不計活擒僞守備陳祥司總夏維青二員賊兵七十  
四名得獲僞劄四張僞委牌八張銅關防六顆高照  
大旗三十二面及救回連江縣幕浦被擄難民婦女  
五十四名口俱經解報總鎮林賢彙解外所有本營  
與賊對仗陣亡目兵林豪等四名被傷經制千總林  
五瑯一員劄委把總李春雷一員兵丁王文龍等十  
九名相應開報其得獲軍火器械留船應用等情又  
據署左營遊擊徐得濟報稱八月二十七日合踪進  
剿在官塘洋面與賊打仗卑職督率戰船併力攻擊  
犁沉賊趕繒船貳隻雙篷船肆隻焚燒賊烏船貳  
隻得獲賊趕繒船壹隻當陣砍殺及砲箭打射落水  
者不計活擒僞總制水師貳鎮總兵官一員吳朝綱  
賊兵三十六名僞銅錫關防二顆救回連江縣幕浦  
難婦三口小子一名俱經解報總鎮林賢彙解外所  
有陣亡兵丁高貴一名被傷兵蘇魁等二十名理合  
報明其得獲器械等項留船備用等情又據中營中  
軍守備陳蘭報稱卑職坐駕砲船率同千總高秉功



各戰船前進攻打賊船得獲賊趕繒船壹隻偽水師  
伍鎮右營副將柯金隆銅關防一顆偽劄二張焚燒  
賊船大小六隻打沉賊船大小四隻陣斬賊衆溺水  
燒死者不計活擒賊衆三十五名奪回被擄難民二  
名俱經解報總鎮林賢彙報外其各船得獲器械查  
明另報所有本營殺賊陣亡兵丁陳維潘一名被傷  
經制把總洪寶一員兵丁唐十等一十八名一并開  
報等情據此該卑職看得海逆鴟張在在狂逞今卑  
職遵奉軍令督發官兵航海一戰而久踞定海等處  
海逆巢穴盡已搗平三營官兵斬殺賊衆不計其數  
活擒偽官三員偽兵一百四十五名口皆仰仗

朝廷洪福本提督威靈所致今據職標將弁塘報前來除  
陣亡兵丁經職捐給銀兩收殮陣傷官兵賞資醫藥  
之資理合塘報等情又據援剿水師總兵官林賢彙  
報內稱職於本年八月二十六日統率舟師出洋前  
至定海二十七日瞭見賊船約有二百隻灣在赤灣  
黃崎地方職料賊必出北茭頭佔我上風隨撥總兵  
官黃鎬帶領該標副將辛啓佑等帶領各船隻俱由



橋仔澳竿塘水洋而進以堵逆賊去後又撥閩安左  
 營遊擊徐德濟帶領千總陳春等各船隻從賊艚中  
 腰進發又撥本標中營副將許英等船隻從傍包裹  
 前進職率本船領旗都司林正春等催督三股戰船  
 同時進發逆賊整陣迎敵其勢甚銳自己至申兩邊  
 砲矢對打我師奮勇夾攻戰船齊力殺進賊勢遂潰  
 犁倒焚沉賊船大小四十餘隻得獲賊船二十餘隻  
 緣賊船俱經打壞帆舵已失各營欲追趕前進難於  
 牽帶隨將所獲之船放火燒燬見存烏船壹隻趕緝  
 船六隻計殺賊衆六千餘人燒死及落水死者不計  
 其數活擒賊首偽總兵副將六員賊兵二百三十三  
 名偽印十三顆偽部劄十二道偽委牌二十五張大  
 旗四十面高照十二面救回連江縣幕浦被擄男婦  
 一百四十三名口各府縣被拿難民二十九口尚有  
 賊魁蕭琛等船艚冒死逃脫未及盡剿時天晚風大  
 浪高勢當收回船兵以俟再舉是役也實賴本提督  
 威靈諒餘氛聞風喪魄無難剿滅除將救回連江縣  
 被擄男婦送交該縣轉發回籍得獲軍器各留營備



平陽紀 卷之一  
用所獲賊船僞官兵印劄旗幟及各府縣被擄難民  
分別造冊解赴康親王發落外合就呈報等情又據  
隨征總兵黃鎬聯絡招撫同知陳子威俱報同前情  
各到臣正在繕疏題

報九月十五日又據援剿水師總兵林賢報稱九月初一  
日早職復令本標右營遊擊江新帶領各營聯絡船  
隻前往北茭大西洋等處協力搜捕奈新等鳥船重  
大頂風難以北上早職復會商聯絡總兵官何應元  
撥令聯絡鄉勇隨駕輕快趕繒雙篷船直抵三沙風  
火門沙埕港口地方窮追殲剿本月初八日准總兵  
官何應元咨稱據守備陳大捷何春立周謝顯等報  
稱初五日至風火門地方望見賊船一隻豎起降旗  
係僞鎮下驍翼營將林興率僞卒楊自名等併攜連  
江縣被擄難民余伍等三名幼男一口婦女二口僞  
委牌一張大旗一面高照一面紅令旗一面鐵甲一  
身斬馬刀九把排鎗五門鑼一面短刀一把投誠其  
所坐船損壞難以牽帶遂卽焚燒今將林興等解奪  
等情又據守備陳春暉把總吳玉林發等各報稱暉



等至沙垵等島遇危宿營副總兵陳起萬帶領僞宣  
毅後鎮壁宿鎮賊船趕繒大小船隻二十餘號暉等  
用命攻殺打破焚燒陳起萬坐船壹隻趕繒雙篷船  
九隻賊官兵溺水莫計陣獲雙篷船四隻陳起萬等  
大旗六面令箭五枝僞龍劄壹張僞委牌六張排鎗  
十門大刀十把百子砲六門弓六張相應呈解被傷  
鄉勇林鏞丁祥等六名又據聯絡守備陳應昌報稱  
奉令遵往福寧三沙風火門擒獲僞宿鎮下僞叅將  
王亮遊擊朱尙都門朱相僞龍劄三張小趕繒船壹  
隻雙篷船二隻船仔船二隻又據聯絡同知陳子威  
報稱本月初六日至沙垵地方見有賊船二十餘隻  
鄉勇鼓銳齊進擒僞水師三鎮林日惠標下僞副將  
林麟趕繒船壹隻僞委牌壹張賊衆盡被火攻全船  
爭跳下水得獲大砲三門銅百子砲三門等情各到  
職隨將得獲船隻器械僞劄逐一查驗明白其軍器  
現在征剿急需交發聯絡留船應用被擄難民余伍  
莊爾任丘朝英三名併婦女林氏阮氏幼男陳應三  
口近就交送連江縣發回收領完聚船隻旗幟牌劄



五周紀 卷之一  
令箭連招撫僞將林興一員僞兵十一名啓解康親  
王發落外合就呈報等情本日又據林賢報稱據聯  
絡同知陳子威報稱本月初二日親督鄉勇直抵三  
都長腰白馬門瀨嶼等處地方剿滅僞鎮吳朝綱併  
僞鎮林十賊窠老寨初三日回至西洋初四早復遇  
僞鎮蕭琛賊艘十餘隻趕至橫山洋奮勇攻殺得獲  
僞鎮蕭琛營下小趕繒船一隻殺賊數十餘人活擒  
長髮賊三名短髮難民一名驗明轉報等情到職除  
啓解康親王發落外合就呈報等情到臣據此該臣  
查看得閩安副將田萬侯同援剿總兵林賢等調集  
各路官兵船隻往剿定海賊艘據報於八月二十七  
日在赤澳黃崎以及官塘等處三路奮擊賊船犁沉  
打碎併燒燬見獲大小船六十餘隻殺賊六千餘名  
燒死及落水者不計活擒僞鎮章元勳等六員僞兵  
二百三十三名又續報招撫僞將林興一員僞兵十  
一名活擒長髮賊三名難民一名併前後得獲僞劄  
印器械等項及奪回被擄男婦俱解康親王發落此  
皆仰賴



皇上德威遐暢康親王籌畫周詳俾官兵用命殺賊遂獲  
大勝則海上餘魂聞風膽落不難立奏膚功矣所有  
在事有功人員併整理船械砲火等項之僉事王國  
泰同知蘇佳嗣恭

請優敘以鼓將來相應密疏題

報伏祈

睿鑒勅部議叙施行爲此具本遵例傳捧謹題請

旨

康熙十七年九月十七日奉

旨覽卿奏副將田萬侯等率領官兵於赤澳等處地方擊  
敗賊船擒斬甚多得獲偽劄器械等項具見調度有方  
將士奮勇可嘉在事有功人員從優議叙已有旨了餘  
着議奏該部知道



飛報大勝疏

題爲飛報大勝事案據防守惠安縣提標前營遊擊敖應第興化鎮標右營遊擊陳永茂稟稱探有賊首王一鵬率衆嘯聚於驛坂舖地方欲阻絕要路職等發兵往剿又復奔匿見今往來無定等情前來臣與撫臣密商此賊不擒終爲後路之患一面差往探聽一面調遣連江營守備鄭興撫標隨征總兵張韜等各帶官兵前往撲剿去後康熙十七年九月十二日據連江營中軍守備鄭興報稱奉本提督軍令帶領官



兵同隨征總兵張韜前往惠安縣會商提標前營遊擊敖應第興化鎮標右營遊擊陳永茂躡緝逆賊王一鵬踪跡相機發兵撲剿等因九月初九日申時據提標前營把總王政稟稱探得賊首王一鵬帶賊兵在黃崎澳本月初六日在前蔡經過王一鵬本身已過橫嶼海中屯駐賊兵約有千餘人現在海邊上西地方屯駐到塗嶺有三十里等情卑職先經密差兵丁偵探續據回稱賊首王一鵬知我兵指日直抵巢穴遂分兵千餘人作叁股在於上西蕭厝沙格叁處屯劄專候抵敵等情卑職隨卽會同張總兵敖陳二遊擊商議進剿留敖陳二遊擊在縣守城卑職等隨於初九日酉時連夜從惠安大路直上塗嶺已值二更時候四更造飯遂望東而進初十日卯時離賊營約有七八里卑職率領千總高祥把總張虎等官兵四百員名從左股望沙格而進提標前營千總田琦隨征把總徐守智等官兵三百餘人從右股望上西而進隨征總兵吳韜帶領守備陳文千總吳拱蘇隆撫標左營把總王正國等官兵三百員名從中股望



蕭厝而進商議分派已定一齊進擊逆賊望見我兵  
進剿隨分一股來敵張總兵率兵先佔山頂迎敵奮  
勇衝擊殺死賊衆甚多賊見勢急合夥齊來抵敵張  
總兵遂放號砲卑職帶領本營官兵飛馳翻從中股  
殺進提標千總田琦等官兵翻從左股殺進張總兵  
翻從右股殺進三股併力攻擊逆賊奔竄下山我兵  
奮力追殺三面合圍砲箭齊發陣斬及投水溺死共  
七百餘人捉獲原被脅從鄉總胡丑賊黨陳連吳全  
潘益潘治許一陸名問據供稱王一鵬未知生死僞  
中營林左營陳右營張後營胡程前營劉齊僞領旗  
營陳德俱皆溺水其救回被擄婦女及陣斬首級併  
得獲馬匹旗幟器械等項俟查明另文呈報此皆賴  
本提督指授方畧將士用命合將殺賊情形呈報等  
情併解陣獲鄉總胡丑賊黨陳連等呈解到臣除將  
押解活賊官兵量行獎賞一面會同撫臣吳興祚訊  
明活賊胡丑等依法梟斬懸示外該臣看得賊首王  
一鵬自臣恢復惠安之後率領餘黨哨聚於沿海通  
省大道依山林爲窠窟逆料臣解泉圍之後必往剿



同安長泰之賊故於衝途梗阻以斷我糧道其計甚狡臣與撫臣計議已定密遣連江營守備鄭興撫標隨征總兵張韜等會合官兵細加偵探果聚於上西蕭厝沙格三處典等乘夜率兵前往逆賊尚敢抗拒官兵鏖戰竟日殺死七百有餘活擒六賊當經正法雖一鵬未知存亡而黨羽溺水據供已確此皆仰仗皇上威靈所及遂使逆賊殲滅其在事有功各官自難泯沒相應密報聽候優敘以鼓勵將來伏祈

勅部議敘施行奉

旨覽卿奏遣發官兵於上西等處地方擊敗賊衆斬殺甚多具見將士奮勇可嘉在事有功人員着議敘具奏該部知道

康熙十七年九月十七日



標員懸缺等事疏

題爲標員懸缺甚多遴才補用以佐征剿事竊照閩省海寇倡亂處處蠡起隨地用兵臣左右將備等官皆時刻調遣之所必需况臣近經題

准調總河山東河南兵三千名以充臣標其送兵官員將兵丁交明仍各回原任是在標接管兵丁之官尤亟須遴選才能以備接受自宜早爲題定庶便領兵殺賊備查臣標各官如中營叅將康泰見署延平副將離中軍之任已久臣按中軍爲伍營首領職司兵馬



錢糧最爲要員務求稱職之才臣見康泰不勝中軍之任且今署延平副將自應遵照

新例另

題候議其中營叅將亟宜坐缺題補者也臣查有投誠總兵見奉王劄之馬勝力捍泉圍晝夜擐甲登陴不避矢石當南城打場重築堵禦保守泉城無恙皆彼首功見今兵民愛戴且才畧優長堪充斯任臣遵例保題擬補福建提標中軍叅將兼管中營事又提標右營遊擊郭成龍在海澄失陷員缺未補臣查有從

松江隨帶入閩見署江南提標遊擊事守備李璉隨臣解泉州之圍在陳山壩建立奇功已經題報候叙擬補福建提標右營遊擊員缺又有見在後營署事遊擊王昶原係浙江督標後營以署叅將管中軍守備事啓明康親王委署今缺蒞事已久衆兵悅服且奉令攻剿屢著勞績自應遵照

新例題補實授又有奉部駁回之金殿龍劉國興二員前以員缺尚自有人故不便准補左後二營守備今則左營守備劉瑞石於陞任後病廢休致後營守備董



子英陞任已久而殿龍等署事有日約束兵卒頗稱厥職更保守泉城有功應將金殿龍仍補福建提標左營中軍守備劉國興仍補福建提標後營中軍守備再查右營守備王虎前營守備徐可成亦在海澄失陷員缺未補臣查有從松江隨帶入閩候推守備陳應龍以署守備管千總事張洪宗經臣朝夕訓練熟諳營務隨解泉圍盡力攻奪洛陽橋要隘見在候叙張洪宗擬補福建提標右營中軍守備員缺陳應隆擬補福建提標前營中軍守備員缺以上俱爲官擇人務與地方相宜方敢擬用故就已試之才照舊請補或於臣素所訓練或於兵民悅服者按缺題補此臣實從封疆人才起見且因臣督兵進剿左右驅遣乏員無以佐臂指之用兼值山東河南兵到尤需才能接管所以亟爲題

請伏祈

皇上念邊海重地正在用兵難拘常格或內有歷俸尚淺資格稍殊統祈允臣所

請早



平陽縣志 卷之二  
渙綸音庶得朝聞

命而夕受事矣除各官履歷送部外臣謹會同督臣姚

撫臣吳 合詞具疏照例保

題恭候

皇上勅部議覆施行奉

旨兵部速議具奏

康熙十七年九月二十六日



